



LAERSKOOL BEAUMONT

Geagte Ouers

20 Januarie 2011

1. VERWELKOMING

'n Hartlike woord van verwelkoming word gerig aan al ons ouers en leerders, veral diegene wat vanjaar by ons aangesluit het. Ons vertrou dat 2011 'n baie goeie jaar vir almal sal wees, en dat u 'n positiewe bydrae sal lewer tot die sukses van ons skool en al sy aktiwiteite. Die begin van die kwartaal het seepglad verloop en dit voorspel slegs goeie dinge vir die toekoms. Mnr Reddell, ons skoolhoof, is ongesteld en op aanbeveling van sy dokter bly hy 'n paar dae by die huis. Ons vertrou dat hy Maandag weer op kantoor sal wees.

Die volgende personeellede het hierdie jaar by ons aangesluit:
Mev S Odendaal – musiekopvoeder in mev van Niekerk se plek
Mev R Frylinck – nuwe Kuns en Kultuur koördineerder
Mej K Payne – Graad 1E5
Mej J Martin – Graad 3E2
Mej L Newton-Foot – Graad 3E5



Ons vertrou dat hierdie opvoeders hul ondervinding by Beaumont sal geniet en dat die leerders sal baatvind by hulle kundigheid en bydraes.

2. INSKRYWINGS



Die leerders het reeds sedert Maandag 17 Januarie 2011 baie mooi aangepas en al die klasse is goed georganiseer vir die nuwe akademiese jaar. Die Graad R en 1-leerders voel reeds baie tuis by Beaumont en dit is grootliks te danke aan verlede November se Oriënteringsdag waar hulle vertrou gemaak is met hul nuwe leeromgewing. Ons het 23 leerders in Gr R ingeskryf, 118 in Graad 1, asook 'n verdere 55 vanaf Graad 2 tot Graad 7. Ons totale inskrywingsgetal vir vanjaar is 1080. Dit is bemoedigend om te weet dat ons klasse van 21 - 33 leerders wissel, 'n situasie wat onderrig 'n aangename taak by Beaumont maak. Ons Afrikaanse getalle neem steeds toe en dit voorspel 'n goeie toekoms op hierdie gebied.

3. KO-KURRIKULÊRE PROGRAM

Elke leerder het 'n afskrif van die ko-kurrikulêre program vir die eerste kwartaal ontvang. Sport sal op Maandag 24 Januarie 2011 begin. Hou asseblief hierdie program in gedagte wanneer u u eie program rondom u kind se oefen en wedstrydte beplan. Dit is ons wens dat elke leerder aan ten minste een somer- en een wintersport of kulturele aktiwiteit wat by Beaumont aangebied word, sal deelneem. Dit is belangrik dat al ons kinders 'n gebalanseerde program by die skool volg sodat hulle talente ontwikkel kan word. Spesiale Beaumont-pette/hoede kan by die klerebank aangekoop word. Ons wil al ons leerders ten sterkste aanmoedig om die pette/hoede gedurende pouses en tydens sportoefeninge/-wedstryde te dra. Die spelers sal nie toegelaat word om aan wedstryde deel te neem indien hulle nie hoede / pette dra wat by die klerebank beskikbaar is nie.



4. OUER KWARTAALBEPLANNER

U kind het 'n ouerkwartaalbeplanner vir u aandag ontvang. Nuwe ouers het hulle program gedurende hierdie week ontvang. Dit bevat waardevolle inligting in verband met vergaderings, funksies en gebeure waarin u sal belangstel. Hou dit asseblief in gedagte wanneer u u persoonlike beplanning doen. Ongelukkig het ons nog nie al die datums vir sommige van die sportwedstryde en byeenkomste ontvang nie, maar dit sal gedurende die kwartaal via die tweeweeklikse nuusbrief aan u gegee word. Alle programme is ook op ons skool se webtuiste onder die "downloads"-afdeling beskikbaar. Ons skool se webtuiste adres is www.beaumont4u.co.za.

5. SKOOLGELD / MUSIEKGELD

Skoolgeld vir 2011 beloop R825 per maand per kind vir 12 maande (totaal R9900-00) en dit kan per debietorder, kredietkaartbetalings, internet of kontant geskied. Diegene wat vroeg hul skoolgeld ten volle (R8091-00) betaal, sal 'n 7% afslag (T9207-00) en 'n afslag van 3,5% oor 6 maande (2 x R4777-00) ontvang. Om vir hierdie afslag te kwalifiseer, moet die betalings die skool teen 28 FEBRUARIE 2011 en 31 JULIE 2011 bereik. Betaling van skoolgeld is verpligtend en ons moedig alle ouers aan om hul finansiële verpligtinge vroegtydig na te kom. Een van die beste beleggings wat u kan maak, is verseker in u kind se toekoms.

Ouers wat vir gedeeltelike of volle vrystelling van skoolgelde wil aansoek doen, moet dit voor die einde van Januarie doen. Kontak asseblief die finansiële kantoor (Margi van de Merwe) vir meer inligting of indien u die nodige vrystellingsvorme benodig. Alle aansoeke vir gedeeltelike/volle vrystelling sal streng vertroulik hanteer word.

Musiekgeld vir 2011 is R475-00 vir groeponderrig en R545-00 vir individuele onderrig per kwartaal. Musiekgeld is



betalbaar aan die einde van Januarie. Lesse sal 'n aanvang neem sodra die musiekgeld betaal is.

Alle leerders wat voorheen musiekonderrig ontvang het en wat wil voortgaan met onderrig by Beaumont, moet die Musiekdepartement direk nader. Graad 2-leerders wat wil begin met blokfluit- en vioolonderrig in 2011, moet ook onmiddellik die Musiekdepartement kontak. Neem asseblief kennis dat daar 'n waglys is t.o.v. die onderrig van sekere musiekinstrumente.

6. NASORGFOOIE

Nasorgouers moet asseblief kennis neem dat daar 'n nuwe betalingstruktuur vir Nasorgfooie vir 2011 is wat betref voltydse en deeltydse sorg.

- 1 betaling per kwartaal - moet teen 31 Januarie 2011 ontvang wees
- 2 betalings per kwartaal - eerste betaling teen 31 Januarie 2011
- 3 betalings per kwartaal - tweede betaling teen 28 Februarie 2011
- slegs per maandelikse debietorder beskikbaar



7. ANDER FINANSIËLE NUUS

Verskeie privaat aktiwiteite, bv. Ballet, Spraak en Drama, Kunsklub, Arbeidsterapie, Spraakterapie, Fiksheid en Genot, ens. word by Beaumont aangebied. Ons wil u vriendelik versoek om betalings vir hierdie aktiwiteite direk aan die betrokke persone te maak by wyse van 'n direkte deposito of via u kind. Sien asseblief die Ko-kurrikulêre Beplanner vir die kontaknommers. Die skool aanvaar geen aanspreeklikheid vir hierdie geld nie.

8. BEAUMONT-OUERVERENIGING: JAARLIKSE ALGEMENE VERGADERING

Die Jaarlikse Algemene Vergadering van die Beaumont Ouervereniging sal op Woensdag 26 Januarie 2011 om 19:00 in die skoolsaal gehou word. Ons wil u aanmoedig om die vergadering by te woon aangesien ons terugvoering sal gee oor projekte wat in 2010 plaasgevind het, nuwe lede gaan verkies om op die BOV te dien vir 2011 en ons sal ook vir u 'n idee gee van wat ons vir 2011 beplan. Ons het die grootste waardering vir hierdie groepie ouers wat ons skool dien en ons sien uit na nog 'n suksesvolle jaar in terme van projekte wat deur hulle aangepak gaan word.

9. VERLORE ITEMS (langs die Tegnologiekamer)

Merk asseblief alle items, bv klere, skoene, sportsakke en –toerusting met u kind se naam, van en graad. Indien items nie gemerk is nie, kan dit nie terugbesorg word nie. Ongemerkte items sal by die klerebank verkoop word. Alle verlore goedere kan Vrydae van 12:45 – 13:15 afgehaal word.



10. TWEEWEEKLIKSE OMSENDSKRYWES

Ons wil u daaraan herinner dat tweeweklikse omsendskrywes voorberei word in 'n poging om u op hoogte te hou van gebeure in en om die skool. Dit word op Donderdae huis toe gestuur en ons nooi u uit om 'n spesiale poging aan te wend om die omsendskrywe te lees. Dit bevat waardevolle inligting wat u aandag vereis. Neem asseblief kennis van die ouer inligtingsaand vanaand.

11. TAG – A-LONG ETIKETTE

Somer is hier!

Dit is noodsaaklik dat nuwe somerklere, kosblikke, waterbottels, nuwe skryfbehoeftes vir 2011 ens. duidelik gemerk is sodat verlore goedere aan hul regmatige eienaars terug besorg kan word.

Tag – A-Long en Beaumont span weereens saam om 'n reeks etikette hiervoor te voorsien en terselfdetyd fondse vir die skool in te samel.

Tag-A-Long is ook gelys onder "Business Names"

in die Beaumont Besigheidsondersteuningsklub. Beaumont ontvang 'n persentasie van alle bestellings en

onderneem om alle gemerkte goedere aan leerders terug te besorg. Voorbeelde van die etikette is by Elmarie in die klerebank beskikbaar. Vir verdere inligting kontak Karen Snyman by karensnyman@telkomsa.net

of 082 925 9988

12. SANDWICH SPREAD

Beaumont was oor die afgelope paar jare betrokke by die "SANDWICH SPREAD"-projek. Dit was 'n uiters suksesvolle projek en het getoon dat ons tog 'n verskil kan maak aan die lewens van die leerders by Laerskool Macassar. Graag wil ons ons nuwe ouers, asook diegene wat voorheen nie by die projek betrokke was nie, van die volgende bewus maak:



Deur 'n ekstra toebroodjie op Vrydae skool toe te stuur, help u om 'n honger kind te voed. Die toebroodjie kan die volgende bevat: Marmite, Bovril, vissmeer, grondboontjiebotter, konfyf, kaas of koue vleis. Sny asseblief die toebroodjie in die helfte deur en draai dit dan in toebroodjiefpapier, foelie of kleefpapier toe.

Ons wil ook beklemtoon dat ons nie net vir 'n ander skool se leerders sorg nie, maar ook vir sommige van ons eie leerders wie se ouers deur uiters moeilike tye gaan. Wees asseblief verseker dat u toebroodjie wel 'n verskil sal maak aan die lewe van 'n honger kind.

13. HERWINNING BY BEAUMONT

Hallo aan al ons 2011 ouers, en 'n spesiale woord van verwelkoming aan al ons nuwe ouers, wat vanjaar deel van die Beaumont familie geword het.

As 'n Eco skool is ons verbind tot herwinning op verskeie maniere, naamlik: Die oranje iglo's vir papier en die groen plastiekdromme vir glas op die skoolterrein, verkeersknoppe tydens Maandagoggende se herwinning (baie dankie vir u geduld daarvoor), leerders wat sakke vol blikke, bottels, plastiek en tydskrifte skool toe bring, onderwysers wat leerders deur middel van notas in hulle huiswerkboeke herinner aan herwinning en kompetisie uitslae in die skool se nuusbriewe, om maar net 'n paar van hierdie aksies te noem. Ons wens is dat al bogenoemde aksies 'n aansporing vir ons leerders en ouers sal wees, om deel te neem aan ons herwinningsprojek. Baie dankie aan al die leerders, met hulle families, wat reeds in die gewoonte is om te herwin.



Ons herwinning word in samewerking met Wasteplan (die Stad Kaapstad se sub-kontrakteur wat verantwoordelik is vir die versameling en verwydering van herwinbare items in ons dorp) gedoen, wat ons glas, blikke en plastiek elke Maandag verwyder, en met Mondi wat elke twee weke ons papier en tydskrifte verwyder.

ONS UITDAGING AAN BEAUMONT SE FAMILIES:

Gedurende Januarie 2010 het slegs 10% van Beaumont se families hulle herwinning deur middel van die skool gedoen en ons het R18 000 ingesamel. Teen die einde van laas jaar het hierdie persentasie verhoog tot 35%, en het ons 'n bedrag van R33 000, vir die jaar ingesamel met die herwinningsprojek. Hier lê nog groot potensiele inkomste vir die skool. Ons wens is dat hierdie persentasie verder sal styg tot ten minste 50% aan die einde van 2011. Ons wil dus die versoek aan al ons leerders en ouers rig, wat nog steeds hulle herwinbare items op die sypaadjie plaas, om dit asseblief in die toekoms elke Maandag skool toe te bring. Die inkomste wat ons hiervoor vanaf Wasteplan ontvang, is letterlik vir "vuilgoed" wat ons sou weggooi. Deur hierdie "vuilgoed/items" te herwin lewer ons elkeen 'n bydrae tot ons omgewing, verhoed ons dat hierdie groot volumes op die Plaaslike Owerhede se stortingsterreine beland, en kan ons hierdie fondse gebruik vir verbeterings by ons skool.

STAP 1: Plaas u huishoudelike herwinbare items in die deurskynende Wasteplan plastieksak.

STAP 2: Op Maandagoggend – Bring die sak skool toe, na die versamelpunte in Onse Jan Weg of na die ingang by die tennisbane tussen 07:30 en 08:00. Ouers van die herwinningspan sal u behulpsaam wees

STAP 3: : Neem 'n leë sak (of 2) om te vul vir die volgende week.

So maklik soos dit! Ons neem dit alles in een sak!! Moenie dit op u sypaadjie laat nie – bring dit vir ons!

***** Indien (slegs indien) u die herwinbare items kan sorteer, vra ons asseblief die volgende van u:*****

Groot hoeveelhede glas moet asseblief apart gebring word en in die groen plastiekdromme geplaas word, sodat ons kan inskryf vir die Consol kompetisie wat op volumes gebaseer is! (In 2009 EN 2010 het Beaumont met hierdie kompetisie eerste in die Wes-Kaap gekom!)

Ons ontvang 'n beter prys per kilogram vir papier van Mondi. Indien dit vir u moontlik is om te sorteer, versoek ons dat papier, telefoongidse en tydskrifte in die oranje Mondi iglo's geplaas word. Dit geld ook vir groot volumes wat gebring word.

WAT KAN EK HERWIN?

- *PLASTIEK bv. Skoonmaakmiddels- en waterbottels, kosbakkies, yoghurt bakkies, vleisbakkies ens. Spoel alle items uit, verwyder deksels en druk alle bottels plat. Kyk onder elke plastiekitem. In 'n driehoek is 'n nommer. Ons herwin nommers 1 – 7.
- *BLIKKIES Spoel koeldrank- en kosblikkies uit.
- *GLAS Spoel bottels uit.
- *TETRAPAK Saphouers en melkhouers met foelie uitgevoer.
- *TYDSKRIFTE Insluitend glanspapier.
- *PAPIER Koerante, kantoorpapier, telefoongidse, plat gedrukte dun karton (ontbytgraan/eierdose)
- *KARTON DOSE Plat gedruk
- *POLISTIREEN HOUERS
- *BATTERYE

Baie dankie dat ons op almal se samewerking kan staatmaak, nie net om ons volumes en inkomste te verhoog nie, maar om ook 'n ingesteldheid by ons kinders te kweek vir die belangrikheid van herwinning!! Die volumes asook die persentasie leerders wat bydra, sal weekliks tydens die saalbyeenkoms aangekondig word.

Navrae : Lisa White by 082 678 5666

Innes Visagie by 073 426 1255

BAIE DANKIE!

14. TROMPOPIES

Beaumont Trompoppies is nou in hul derde jaar. Die doel van die groep is om 'n omgewing te skep waarin dogters van Graad 1 tot 7 in groepverband en in formasie op die maat van musiek kan saamwerk. Dit is 'n sosiale klub waar ons slegs by skoolfunksies en by uitsondering by plaaslike gemeenskapsgeleenthede optree. Hierdie jaar wil ons 'n span kies om aan die Nasionale Kampioenskappe in



2012 deel te neem. Alhoewel ons die aanleer van vaardighede op 'n professionele wyse benader, fokus ons ook op pret en plesier. Kelly, 'n voormalige SA kampioen, sal ons hierdie jaar bystaan. Indien u dogter belangstel om in te skryf as trompoppie vir 2011, kry asseblief 'n inskrywingsvorm by Mev Steyn in die rekenaarsentrum. Die fooie vir 2011 beloop R280.00 per kwartaal en dit sluit alles in. Oefeninge begin op Donderdag 27 Januarie 2011 vanaf 16:15 tot 17:30 in die skoolsaal. Vir navrae skakel Mev. Steyn by 083 567 0409.

15. BIBLIOTEEK

'n Paar boeke het deur die loop van verlede jaar weggeraak. Ons versoek alle ouers om by die huis te kyk of daar enige biblioteekboeke rondlê. Indien wel, besorg dit asseblief so gou as moontlik terug aan die biblioteek.

Leerders sal biblioteekboeke slegs na skool kan uitreik en terugbesorg aangesien die biblioteek as 'n klaskamer gebruik word totdat ons nuwe geboue voltooi is. Moedig asseblief u kind aan om wel die biblioteek na skool te gebruik.



16. ALGEMEEN

- Gr R gaan dwarsdeur die jaar om 12:30 huis toe.
- Graad 1 – 2 gaan huis toe om 13:00 terwyl Graad 3 – 7 om 14:15 huis toe gaan.
- Die Beaumont Klerewinkel sal elke Dinsdag en Donderdag van 13:00 – 14:30 oop wees.

UIT DIE KANTOOR

Ons is op soek na twee entoesiastiese Christen ouers om die Christen Uitreikklub in 2011 met 25 Graad 1-3 leerders te lei. Die persone sal elke Vrydag van die kwartaal van 13:00 tot 14:00 beskikbaar moet wees. Bystand en ondersteuning sal voorsien word. Kontak asseblief B Austen by 084 234 0103

17. BELANGRIKE DATUMS

Donderdag 20 Januarie	:	Graad 4 – 7 ouerinligtingaand om 19:00	
Maandag 24 Januarie	:	Gr R gaan om 2:30 huis toe	
	:	Graad 1 gaan om 13:00 huis toe	
	:	KO-KURRIKULêRE PROGRAM BEGIN	
	:	BOV vergader om 19:15	
Dinsdag 25 Januarie	:	Klasfotos	
Woensdag 26 Januarie	:	Interhuis Atletiek Velditems 14:15–18:00	
	:	BOV Jaarvergadering	
Donderdag 27 Januarie	:	Interhuis Atletiekbyeenkoms 07:15–14:15	
	:	(indien uitgestel weens onweer vind plaas	Vrydag 28 Januarie 2011)
Vrydag 28 Januarie	:	Senior Koor Kamp	
Saterdag 29 Januarie	:	Avontuurklub: Staproete by Stellenbosch	
	:	Senior Koor Kamp	
Maandag 31 Januarie	:	Graad 1 sport begin	
Dinsdag 1 Februarie	:	Graad 2-7 Individuele foto's	
Dinsdag 2 Februarie	:	Graad R en Graad 1 op sportveld	
Donderdag 3 Februarie	:	Graad 4-7 Swemgala	

Vriendelike groete



L Kets
Onderhoof

01/2011